

## **Kara dēinū žīdkapiūsė**

Poikė, aukštė žmuoniū sūnā  
Jumis vėsus čė ištratėna –  
Vīrus, muotrėškas, vākūkščius;  
Negesintās skalkės užbierė,  
Užvertė akminimis smagės  
I žvīroutuoms pėlkuoms žemiems.  
Nepalėka niekuokė ženkla –  
Nie mėnkiausiuojė stėibėlė!  
I kap tīčiuoms tiktā kelė  
Mėnkė medgalė išdīgė –  
Ka i žuolie mėnkā težel.  
Gal čė kromslė par daug stombė?  
Skalkė šaknis gal nujiedė?  
Mes i dabā dėdlė tonkė  
Laužuom galvas – nesuprontam:  
Kam jūs maišiet, kou užkliuvuot, –  
Dielkuo jums gīventė neleida?  
Nie kaulieliu jūsa gal nebier,  
Bet, atruoda, ka vēstėik šaukat  
Burnuoms negīvuoms iš žemės:  
„Nepasitikiekėt žmuonims!  
Žvierėis nier baisesnė už žmuogo:  
Maldas užmėršt, Pondėiva užmėršt,  
Tieva muotinas švėntus žuodžius,  
Je tik bepruotis kuoks atsirond  
I joudėms darbams pakorsta“.  
Kapā šauk! A vėsė gėrdam?  
A beatmėnam, kāp tratėna  
Mūsa žemelie būriū būrius  
Vīru, muotrėšku, vākūkščiu?  
Šaudė jug tuokėi patis vaikė,  
Tuokėi patis žmuoniū sūnā,  
Poikė, aukštė ligu lėipa...